

WSC2019: Mutu pengadilan di Kazan dipertikai

AstroAwani

1 September 2019

Raja Hisyam Raja Zaid,

SEPANG: Mutu pengadilan yang dikatakan berat sebelah didakwa antara faktor pasukan negara yang bertanding di World Skills Competition (WSC2019) di Kazan, Rusia tidak mencapai sasaran.

Perkara itu didedahkan Chef de Mission negara Datuk Mahfuz Omar dan juga ketua pasukan negara Halim Jahaya sebaik tiba di tanah air pada Sabtu.

Kontinjen negara tiba dari Rusia di Lapangan Terbang Antarabangsa Kuala Lumpur (KLIA) kira-kira jam 5.30 petang Sabtu.

Mereka kemudiannya diraikan pada satu majlis makan malam yang dihadiri oleh Menteri Sumber Manusia M. Kulasegaran.

Namun ketika ditemui media, jelas riak wajah yang penuh ketidakpuasan hati. Semuanya gara-gara mutu pengadilan yang dikatakan tidak profesional dan berat sebelah.

"Saya tak nak sebut negara mana tetapi ada negara yang tidak langsung memberikan pemarkahan kepada peserta kita dalam bidang fesyen umpamanya.

"Sedangkan negara-negara lain, negara barat yang lain, beri markah. Jadi ini memerlukan komunikasi antara pakar-pakar dalam negara kita," kata Mahfuz.

Isu tersebut turut dirasai ketua kontinjen negara Halim Jahaya yang turut berasa ada kepincangan dalam mutu pengadilan.

"Puak-puak dia, ada *clique* dia. Euro ni kebanyakannya akan sekali. Sebab itu pada pertandingan dunia ini, selain WorldSkills Competition, ia ada dipanggil Euro Skills melibatkan negara-negara Euro.

"Dia akan bersama bincang apa yang terbaik agar dia menang," kata Halim.

Kedua-dua mereka merujuk kepada nasib yang menimpa Hanafi Osman, 22, yang bertanding bagi kategori fesyen teknologi yang turut mendapat pujian banyak negara, namun diberi markah yang terlalu rendah.

Pada kejohanan tersebut pasukan negara membawa pulang satu pingat gangsa menerusi Aiman Afiq Suradi dalam kategori Junior Skills selain sembilan pingat kecemerlangan.

"Untuk dua tahun berikut, saya akan perbanyakkan latihan juga berhubung dengan peserta lain untuk berkongsi idea."

Kejohanan seterusnya akan berlangsung di Shanghai, China pada 2021.

© 2019 AstroAwani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/wsc2019-mutu-pengadilan-di-kazan-dipertikai-216431>